

今仔日剃頭仔師父已經行過去第3擺矣！當然，tuà咧附近的人，一工行過幾若擺擺是正常--的，毋閣剃頭師父今仔日怪奇的所在是伊逐 (tāk) 擺行--過的時陣，攏越 (uát) 頭共阮相--一下。

「媽，剃頭仔哪會遮奇怪，行過去幾若擺矣，閣逐擺擺共咱看--一下。」

「今 (tann) 伊最近定定按呢，毋知欲創啥？」媽媽咧整理指甲油，照色水pîn 頭排 kah較整齊--咧，按呢欲擦的時陣，才知佗一色佇佗位。自細漢媽媽就足討厭阮耍 (sng) 伊的指甲油，一方面驚阮搥 (lòng) 破，一方面就是無愛阮 hiau。我恰阮妹妹差3歲，往早阮媽媽攏會講阮一个壓霸，一个gâu賤。免臆--矣啦，我是壓霸的彼个，毋閣我嘛是真愛賤指甲油。細漢的時陣人矮，平常時仔提袂著，等若人客欲來擦，媽媽才會共規盤的指甲油捧 (phâng) --落來，毋閣猶是驚予 (hōo) 人罵，kan-tann 敢倚--過去小可仔拈 (lā) --一下，一罐一罐看一个仔色水覓 (māi) --咧，毋敢規罐提--起來，閣較免講拍開拭看覓。

「我kám會使擦--咧？tsit-má咧讀國校5年的弟弟覆佇媽媽邊--仔看真久--矣。」

「也無查poo咧擦這啊」媽媽共指甲油收--起來，款囡仔弟弟提袂著的所在，才講：「弟弟來，我共你頭毛剃剃咧。」

媽媽學做頭毛當然是學做查某的，按呢就無可能會曉共人剃頭，毋閣最近媽媽買著一支電動的摠 (lu) 仔，會使看是欲摠幾分，就換幾分的摠仔頭，看--起來真好用款。本來是因爲前一暫仔查某囡仔流行較像查poo的短頭毛，所以後壁愛小摠懸 (kuân) --一下，才去買這支摠仔，其實嘛是會使用鉸的，以前攏嘛是用鉸--的，只是彼陣當流行，用鉸的傷忝 (siunn thiám)，材料店閣咧推銷，就買--落來矣，嘛毋知遮 (tsiah) 好用。

弟弟坐佇鏡前，我對鏡內底看--出去，摠仔摠的所在，短短的頭毛一簇一簇落--落來，查poo囡仔頭毛發足緊--的...。剃頭仔師父閣行--來矣，毋閣這擺伊看著阮煞停--落來，過2秒鐘以後，伊對阮遮行--過來。

「I-me！」剃頭仔師父叫阮媽媽的名，彼兩字一定是中文無毋著，是媽出外家已號--的，毋閣，自細漢阮問伊彼兩字是佗兩字，伊就是足神秘，無愛講，佇台北抑是爸爸彼片 (pîng) 的親情，攏是叫伊「I-me」，佇北港，人就會叫伊阿英。毋閣，阮媽媽的名嘛毋是阿英，伊身分證頂面的名是號做吳金，彼是報戶口的時陣一个無熟似的人共阿祖講這個名好，阿祖就信--伊，自按呢號這個名，無，本來是欲叫阿英啦！這三个名，自細漢我就霧sà-sà，好佳哉，我只要叫媽媽就袂 (bē) 予人罵--矣！

「I-me，你原來就是有買這款摳仔-噢，我都想講恁阿谷這粒頭剃kah遮呢媵（suí）是啥人剃--的，以前你毋是攏用鉸（ka）--的？tsit-má就是用剃--的噢！害我踎遐（hia）想規晷，逐改行--過攏真好奇，偷偷仔共恁探看覓（māi），今仔日才予我相--著矣！」

師父笑kah喙仔嘻嘻（gi-x），毋知咧歡喜啥，我看弟弟共表情激kah ká-ná 像『小丸子』全款，媽媽嘛是笑咪咪。

（約900字）